


Lubén posseda neginas atgnas gaglinas



Sa tgei ch'jeu hai? Jeu sesentel insuma buca bein. Sa sch'jeu hai era quella febra che tons han pigliau a Haiti ? Jeu sun staunca e stracca e sai far nuot encunter. Nus havein buc'avunda daners per cumprar medischnas. Pia sperel jeu dad esser en cuort puspei sauna.

Jeu hai num Lubén Mitchèle Ludwine ed hai 12 onns. Jeu habiteschel cun mia mumma, mia tatta e mes dus frars pli pigns el marcauet da Désarmes. Sur da miu bab pos jeu buc discuorer. El ei morts avon tschun onns, durant il grond tiaratriembel. Jeu lasch encrescher per el. Mia mumma ei separticipada vid ina grupp da spargn, che vegn sustenida dall'unfrenda da cureisma dalla Svizra. Cul respargn communabel sa ella cumprar mintgaton in pli grond quantum ris e vender quel sin fiera. Aschia savein nus gudignar zatgei daners. Igl ei

buc la massa, mo ei sto tonscher per viver. Nus havein tschun gaglinas. Quellas s'audan a mes frars. Aschia san els gudignar entgins daners da sac cun vender ils ovs. Jeu possedel neginas gaglinas. Donn! Per cletg survegn jeu il bigliet dil bus per ir a scola ed ils daners per la tschavera da miezdi. Jeu hai plascher da mes pindels entuorn la canviata. Els ein aschi gagls. Quels hai jeu survegniu sco regal. Els ein mes ornaments. Jeu hai gest finiu la tschunavla classa. Uss havein nus treis meins vacanzas. Jeu mon bugen a scola. Jeu hai adina notas denter sis e siat. La megliera nota ei diesch. Miu rom preferiu ei leger. Quei fetsch jeu tgunsch e vegnel ludada dalla scolasta. Pli tard vi jeu daventar tgirunza. Jeu tgiarel bugen glied malsauna.

In di ella veta da Lubén „Oz sun jeu levada allas siat. Jeu sun sedestadada pervia dalla canera sin via. Jeu hai siult empau buglia da terc e buiu aua.

Avon nossa casa ha ei in dutget. En quel hai jeu lavau il resti da nossa famiglia. Per far quella lavur hai jeu giu treis uras. Quella lavur fetsch jeu bugen. Jeu segidel era bugen en cuschina. Jeu cuschinel bugen ris ed arveglia sin la platta da fiug.

Tgei fetsch jeu buca bugen? Ir alla fontauna per aua. La sadiala emplenida ei semplamein memia greva per mei.

Jeu fetsch bugen Marelle, quei ei in giug da siglir - da parvis ed uffiern. Denteren hai jeu era liunguriala. Cheu marscha semplamein buc la massa. Nus havein negin current e negina glisch electrica en casa.

Pia mon jeu la sera baul a letg. Jeu partel la combra cun mes frars. Perquei ch'igl ei bia memia cauld en casa, sedurment'jeu mo darar immediat.”